



Schnitzulbank 2007

Fasnachtsgesellschaft Muotathal

Guät Tag midänand lär liäbä Lüt
iär sind üs härzlich willkommä hüt
all wettid wieder wüssä, was ds letscht Jahr isch glaufä
das cha jedä vernäh, wännr tuäd ä Schnitzulbank chaufä

Wänn einä scho dr Wäg i das Blettli duät gfindä
dä muässr wägä dem nu wiitniänä afä spinnä
da drinnä nämmr jedä ischr gross odr chlii
isch im Ried vor odr im Bisisthal innä gsii

Durnäs Fahrverbot duäd ä Buur alig mid um Transporter fahrä,
will är det obä z'leh hed, äs paar Hektarä
inäklagt hedä duä einä will är alig täg det durä chnorzä
d'Polizi hed duä gmeint, är söll nur witärhi det ufä borzä

I dr Sunnä hindä duäd alig änu das und disäs laufä,
a dr nah Täg düänds det ä hufä Kaffee und Biär verchaufä
einä hed amä so ä Abig z'azündä nüd ghörig erlittä
midämänä blauä Aug und z'Nasäbluätä heig duä disä müässä gu liggä

Bim Spilä hend Göflä äs Betonmöckli gfundä,
dr Bsitzär hed dänkt, das hed gad nu Platz i dr Muota undä
bim Ruährä heig duä das Möckli ds Ziel nüd troffä,
är heds duä ächli i dr Sunnä änä a di nü Fassadä anä gworfä

Ä mehbessärä Gschäftsherr isch mid sim Bonzäauto i Pragul ufä gangä
bim Uusschtigä isch är us Versehä a dr automatischä Verriglig bhangäd
dr Autoschlüssel hed är duä gha igschplossä
ugärä sig är duä midämä dräckigä Opel is Tal apä gschossä

Zwee jung Burschtä hend einisch midärä Frau afä karisiärä,
nach äs paar Biär heigids duä mit ihrnä Füdlä afä plagiärä
ufsmal heigid diä zwee d'Hosä und Underhosä apäglah
diä Frau heig sich duä der Schnappschuss mit äm Photiapparat nüd lah entgah

Üsi Politiker im Tal das sind doch schlaui Gsellä
vor dä Wahlä düänd si immär sakärmänts ä hufä Wahltafälä ufstellä
doch Gsetz hends duä meini nüd äso im Chopf inä gha
überall hendsäs duä meini nüd dörfä la stah

Im Sunnähalb obä hed einä äs Auto parkiärt
Gang usä, Handbrämsi los, a dem seid mä nüd viel studiärt
Über Strass und Fäld isch das Auto grollt
är heds duä usum Wald usä widär gholt

I dr Flüälä obä gschniid heds bimä Fäschd as wenä Laui
ä Strippäri hed det ufä wellä gad ächli ä schlaui
doch voranä aglütä heig duä diä Damä im Bürgäli hindä scho
Äs soll da einä mit Chettänä obä inä cho

Nach äs paar Biär hend zwee jung Mannä änu afä Wärbig machä
d'Sinn cho sind nä duä wahrhaftig nackti Tatsachä
Ufs blutt Füdlä hends gschribä gha und sind is Meitschä inächo
„Ein so schönes Klo gibt es sonst nirgendwo!“

Ä Lehrer isch mid sinä Abschlussschüäler änu gu z'Mittag ässä
das wärdid diä Schüäler sichär nu lang nüd vergässä
bstellt hed dr Lehrer und hed näs sauft mögä gönä
zahlä heigids d'Schüäler am Schluss duä sälbär chönnä

Im Summär gänd d'Buurä z'Veh alig z'Alp
au ä Riätner Buur macht das alig galant
ja wämä z'Alp fahrt sött mä alig alls Veh ablah
suscht duät am Abig nu eini samt Chlopfä im Gadä innä stah

Au a dr Chinderrott söttid alig Tambourä si
doch vo dä Thaler isch färä gsi ä keinä derbi
vo Schwyz ussä inä hedmä müässä la cho
sött mä ächt a üsnä das Jahr gä meh Lohn

Bim ISV isch bim Aschwingä gsi einä scho bsoffä
äs hedä duä alig scho abäm Stuähl apä gworfä
duä hed är gmeint är heig usöd Chraft
bim Steistossä hendä duä di meischtä usglacht

Midärä Muättersuu hed ä Buur wellä zum Äbär fahrä
det hättid diä zwee sich duä söllä paarä
usum Ahänkär usä gumpäd sig duä das Suuli nu hargli
bis dr Buur das gmerkt hed sigsi gad ä Schutz im Schachä undä gsi

Ä wahri Pracht vomä Gartähaag hed im Hinterthal änu öper vollbrungä
ja wämä das gseh hed hed mä sich grad schiär hindersunnä
Abschnitt vo Kabulrollänä hend diä guätä Lüüt umä Gartä tah
Wämä nur scho dranä gluägt hed, heds diä Stäckli afä überschlah

I dr Klön innä hends gha äs Stackähorä ufum Tisch
det drinnä sind gsi Bluämä ganz frisch
vernu hed das dr Wildhüäter und isch gu luägä ender gli
käs Wunder hed är doch gmeint, äs sigid Steibockhorä gsi

Stei meintämä söts uf der Welt medä gnuäg ha
i dä Bäch innä düänd z'hufä umästah
z'wenig gha hed duä glich nu einä
i dr Änzänä obä hed der Unternäher gmeint, äs gsächä bim Näh keinä

I dr Bächlärä undä hemär im Herbst gha ä Attraktion
zwee Süü sind det gsi i Aktion
Ja diä zwee hend diä Ruäh und der Fridä ghörig gnossä
nach zwee Wuchä heds duä dr Bsitzär ä widär drheimä igschplossä

3 jung Mannä hend im Pub ächli Alkohol gnossä
prezis a dem Abig isch d'Polizi im Tal umägschossä
das hed a denä Burschtä nüd viel atroffä
hei gstossä hends duä ihräs Auto flätt bsoffä

Am ISV hed mä chönnä Gabä spändä
ä sörtig hends det agnu mit offnä Händä
ä bessärä Herr hät nu wellä äs Velo sponsorä
das hät är schleuär imä Museum igfrorä

Ä Wiähnachtsbelüchtig hed einä am Huus anäta
das hed usgseh wundärbar
doch diä hed är duä das ganzi Jahr la si
im Herbscht sind diä Kabul ächli obänand gsi

4 Mannä hend is Meitschä gmacht Stripp-Poker
2 vo denä hend duä fiartig zogä dr Joker
bim Seichä hend si alig nüd äso lang gha
käs Wunder, hendsi nur nu äs T-Shirt agha

Ä Tank vomä Töffli hend 2 jung Mannä azünd
drnah brav gluägt wes i dr Muota undä verbrünnt
d'Füürwehr und d'Polizi heig duä öpär la cho
a denä heigid diä zwee müässä gäh fiartig dr Loh

Imä Gädäli innä hed einä ä Mähbalkä gha
der hät schins nüd dörfä det stah
ufsmal isch duä der Balkä verschwundä
bim Heumeihä hendsä duä im Land ussä widär gfundä

Uf dr Glattalp obä sind all härzlich willkommä
sigids Frömd, Hiäsig und au di Frommä
doch z'Understah bimä Gwittär duäts nüd bi allnä Wirt erlidä
mit Hund und Stäckä hed är duä d'Lüüt afä vertribä

Dr Summer isch einä einisch nu gu nachtwandlä
das isch nüd schöns und mä duäd sich nur ä ltrag im Schnitzulbank ihandlä
drheimä hed duä der guäti Maa meini nüd wellä sii
füdläblut sig är ussä dum Huus ussä gsi

Ä Gruppä Jäger hed einä uf Riemenstaldä tah
vo det us hends wellä ufä Kiänzig und is Thal apä gah
doch diä Jäger hend duä nüd dr richtig Hogär preicht
z'Riemenstaldä heds duä diesä wieder greicht

Di nü Raiffisä-Bank hends galant gmacht
doch Buarbeiter hend det nüd immer glacht
uf d'Statik vomä Gebüü söt mä scho Rücksicht ha
suscht duäd dr 2. Stock gad äs paar Zentimeter nachälah

Ä nüi Schneefräsi wot d'Gmeind zuächä tuä
das hed a dr Gmeindsversammlig gstiftät ä chli Uruäh
dr Maschinäring hät det änu äs paar Nötli wellä näh
z'letscht heds duä glich ä nüi Fräsi gäh

Afä güüsä hed ä Service-Tochter sakärments imä agrschibnä Huus
i dr Chuchi ussä isch gsi ä chächi Muus
i dr Beiz innä hed mä das sauft ä vernuu
midämä Bäsä hed sie duä d'Verfolgig ufgnuu

Uf Schwyz usä sind au Thaler Chlepfär
hend dett übernäh wellä z'Chranz Zepter
sie hend duä gha sauft drwil
heignu hends duä einä z'viel

Midum Traktor Siloballä umämännä verbirgt vili Gfahrä
das hed au ä Jungbuur müässä erfahrä
uf dr Hauptstrass isch duä glägä der rund Fladä
midämä Sitästapler hendsä duä widär gladä

Näbä dr Ski-Pischtä hed ä Frau weliä ihrä Drang gu verrichtä
d'Ski nu agha und nu brav prichtä
ufsmal sind diä Ski gägä Pischtä afä gah
duä hend rati all gseh, öbs gsi isch ä Frau odär ä Maa

Voräm Dessert hed ufs WC müässä der guäti Maa
är heds gad ufäm Tisch la stah
d'Kollegä hendums duä gschnäll äwäg gfrässä
Schnee mit Schnaps hed är duä drna gässä

Nach ämä Fäschd isch wordä einä änu aktiv
d'Fründin hed ihm agleid äs Präservativ
doch leider hed der jungi Maa sis Motörli nümä mögä aglah
ds Präservativ heig är am Morgäd nu agha

Anäs Fäschdtli imä Restaurant hed eini ä Chuächä brungä
halbä hends duä gad versprungä
zweiähalb Jahr igfrorä hedä duä einä gad därheimä
zum 60igschtä vo dem Wirt hedä duä meini wellä ässä meh ä keinä

Arbät gid äso ä Schnitzulbank z'dichtä
D'Lüüt wüssid drnah au eh öppis z'brichtä
I dr Fasnacht söttmä äs Gschpässli ärliidä
Susch tuäd mä am beschtä dähäimä bliibä

Soo, ich glaubä äs täts jetzt wieder fürnäs Jahr
Das wo miär gseid hend isch meh odr mindr wahr
Wänn einä meint är chöns bessr bringä
Dä channär z'nächtscht Jahr ä ga hälfä singä